



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

17. Kalenderwoche – ab 23. April 2011

Sorschn

Isch weeiß nisch, ob Sie das ooch gelähsn ham? Nee? Da hads eene Umfrache in Deuschland gegähm, woriebor sisch dor Deutsche am meisdn Sorschn machd, wennor in de Zukunfd so neinguggn dud. Moddo: Gudn Morschn, liebe Sorschn!

Die Umfrache is nisch von dor BILD-Zeidung gewähsn, abor se war drozdähm sähr erschdaunlich. Was gloom Sie, um was sisch dor Deutsche... also, dor Deutsche im schdadisdischn Durschsnidd!... - um was dähr sisch de meisdn Sorschn machn dud? Na?!

Nee, nisch um de Bedrohung dursch de Adomgrafd... - nee, ganz so bleede is dor Deutsche nu ooch widdor nisch. Bei hunnorde von Adomgrafdwerke, dies in dor Weld seid Jahrzähnde gähm dud, grade ma e baar Dudznd Dode...! Das is ungefähr genau so gefährlisch, wie Nasebohrn!

Abor da wolln mor uns ma lieber nisch schdreidn... - isch weeiß ja ooch, wie de Schdimmung grade is. Abschaldn, abschaldn...! Wobei - isch bin ja ooch nisch unbedingd fiehr de Adomgrafd! Nee, wenn dor Schdrom mid Wind un Weddor gemachd wird, soll mir das ooch Reschd sein! Schdrom is Schdrom, wennor aus dor Schdeggdose rauskomm dud!

Nee, es is abor nisch de Adomgrafd, wesvorweeschn sisch dor Deutsche de meisdn Sorschn machd. Ooch nisch dor Glimawand! Nee, da haddor sisch doch schon längsd dran geweehnd! Nee, es is... - nee, ooch nisch dor indornadsjonale Derrorrismus! Nee, ooch nisch de Finanzgriese, nisch de Eurogriese, nisch dor Hungor in Affriga, nisch de Gorrubdsjohn... nisch dor Bevelgorungsschwund... - nee! Sie komm nisch droff! Sie kenn da nisch droff komm!!!

Dor Deutsche machd sich de meisdn Sorschn, dass de Breise fiehr de Enährgie schdeischn kenndn.

Ja, dor Deutsche sorschd sisch um sei Bordmoneeh!

Nascha, eens is bei dor Sorsche velleisch ganz rischdisch - de billische Enährgie wird immor wenischor! Wemmor nu ganz sachlich un nischdorn an die Sache nangehn däde, kennde mor allordings schnell eene eenfache Leesung findn - nisch mähr soviel Enährgie vorschwendn! Basda! Abor dor Gedanke, dass mor ehm e bißl Enährgie einschbarn kann, dähr lieschd außorhalb von dor Denkmeeschlichkeed von eim vorweehndn Deudschn. Liebor Adom un billischor Schdrom!

Dor Deutsche is ehm doch mähr e Dischdor un Denkor, als wie e vornunfdbegabdes Wähsn! Das zeischd sisch werqlisch immor widdor! Guhd, es dad ma baar Jahre gähm, wo das dridde Reisch war, das ja eischendlich dausend Jahre dauorn sollde... also, wo das Reisch zu Ende war, nach nischma zwanzisch Jahre... da warn mor das Volk dor Rischdor un Henkor... vierzisch Jahre warn mor dann im Osdn das Volk dor Jublor un Schwenkor... - Fahnenschwenkor, Phrasnschwenkor, Gognjagschwenkor! Heidzudaache simmor das Volk dor Singls un Benkor... abor mid dor Vornunfd dun mir werqlisch e bißl off Grieschsfuß schdehn! Wobei... isch gloobe, da sinse ooch in anre Ländor nisch viel bessor als wie mir! Leidor!

Eduard Sachsenmeyer